

QUÆSTIO MEDICA.

CARDINALITIIS DISPUTATIONIBUS
manè discutienda in Scholis Medicorum,
die Jovis terciâ Martii.

M. ABRAHAMO THEVART, Doctore
Medico, Præsîde.

Est-ne improbanda nutrix obnoxia menstruo profluvio?

I.

U T ab infantiâ vitæ ducit exordium homo, sic ab eâdem fundamenta jacet secundæ per reliquas ætates aut adversæ valetudinis. Admissam quapropter infantiæ decursu culpam incuriæ luit non rarò senex immeritus. Huic præcavendæ hoc Medicus esto diligentior, quò magis habet exploratum, quid firmandæ posteros ad annos aut convellendæ sanitati possit *γαλακτομὸς* infantium. Illis recens in lucem editis, necdum solidiores atterere cibos subigereque valentibus, idoneum adornavit alimentum natura nec insuetum: quippe quo, dum fœtus adhuc uteri latebris contineretur, jam habuerit vivere. Lac substantiâ, colore, sapore usuque chylo simillimum, ab ipso aliquâ tantum præparatione discrepat, ulteriorique coctione. Si ductus desideres quibus chylus ad mammas deferatur, lactis ibi caractere insigniendus; quam luserunt operam hucusque Physici nimium curiosi complures, in canalibus investigandis, per quos materia nutriendis siccioribus ossium partibus destinata fluere possit, ipse & ludis tuam. Utilius hanc ponito pædotrophicus, in laudabili lacte diligenter internoscendo, quod consistentiâ mediocri prompserint ubera, colore album, subli.

vescensque nonnihil, gustu suave, odore gratum, neque spumofum, probator illud, modo quantum necessitas ad infantis alimoniam requisita postulaverit.

I I.

QUEMADMODUM vivifici nectarii hujus bonitas delicata est admodum fugaxque, sic & rara nutrix, cujus lac alumno tam salubre fuerit, intimam ut ineat amicitiam cum illius corpusculo, coëatque cum ejusdem succis, ni matrem excipias, cujus lac, nonnihil vitiosum, quolibet altero salubrius infanti, Præstabilis hæc nutrix, quam commendant juvenilis ætas, habitus corporis *ἡσυχίας*, floridus faciei color, elegans vultus, à quo alumni concilietur amor, suavitās vocis, eundem recreatura cantu, vel torminosos ejus levatura dolores, mammarum justa moles, consistentia molliorem inter atque renitentem media, figura pyrum utcunque referens, albedo cæruleis vasorum distincta coloribus, area minimè decolor, papilla fragæ similis ac prominens, quæ se infantis ori opportunè accommodet. De capitis crinium nigritie minus esto sollicitus candoreve dentium, hos ubi caries nulla tentaverit, quam de temperantiâ continentiaque nutricis; animo, à tristibus, jucundis aut vehementioribus pathematis prorsus immuni, munditiei studio, cujus ergò tergendis identidem incumbat tenellulis artubus alumni, fasciis ritè involvendis, perfectâ demum vacuitate singulorum quotquot oportet ad sanitatem excerni, *καταμύων* etiam, quibus plurimas inter nutrices pauca observantur obnoxia.

I I I.

ENIMVERO lactantium alia nequit esse conditio, si ratio periodici profluvii habeatur, quam cæterarum mulierum. Fœmina propemodum omnis huic servituti mancipatur, quoniam hominum genus istud edax, vasa multo sanguine distendit, cujus à vita deside nulla planè jactura fit, aut certè perexigua, cujus & moles alienis scatet, præ nativi caloris atque ventriculi fermentorum imbecillitate. Luxuriantes itaque vel peregrinos humores, inediâ laboreque rescindendos per uterum exigi provida natura curavit, cum ne sibi foret oneri nimia cruoris ubertas, ut ut probi, tùm ut remaneret à sordibus immune quidquid est ab istâ secretionē

superstes. Paribus credas commodis gaudere debere nutrices, quarum vas, quæ sanguine, forsân & degeneri tuebant, menstruo profluvio depletis, lac nihilo paucius, & nihilo deterius; è contrario sufficiens & probum præbetur alimentum infanti. Mammæ igitur, quo tempore calor & spiritus consueto circa uterum occupantur ministerio, per materiæ convenientis appulsum admonitæ sui muneris, pro more vocantur ad opus lactis, quod vero notatur humoris nutritij sigillo. Mirere opificinam illarum nullatenus interturbari conversatione quadam caloris & spirituum ad muliebria loca; tantam videlicet habent illæ proclivitatem ad confectionem lactis, quantum istud plurimum sit, laudabile, dicam & statim, ex dilutiore chylo, & à calore, vel minoris energieas.

I V.

VERUM si menstruo vectigali fuerit adstricta nutrix, inquires, numquid de ordinariâ infantis annonâ plurimum non detrahetur? præsertim si paulo liberalius pendat vectigal istud, aut diutius. Lac etenim aliud nihil cum sit à sanguine dealbaro, quantum de hoc per loca muliebria mensibus quibusque decesserit, tanto & consequens est ut alumnus minuatur familiari cibario. Præterea quis status quæve crasis est lactis in nutrice, dum appetentibus secretionis periodicæ temporibus peculiaria cientur in utero fermenta, cruoris exitum promotura propediem. Intestinæ luctationi, propter citatam ipsius eruptionis diebus circuitiorem sanguinis, succedit excitata civilis in cruore confusio, ventriculi concussura leberem, indeque chylum in ubera deferendum infectura vitiosè, vel hoc posito quod non è sanguine lac. Quasi vero deceret nativum calorem ludere, seu operosam in conficiendo cruore operam ab eo poni, quâ debiti substantiæ nobiliori conatus in aliam ignobiliorem impenderentur minori que molimine parabilem. Adde quod ἀδυνατον prorsus tantâ sanguinis copiâ singulis diebus minui lactantes, citra quamvis, ut contingit, virium amissionem. Ideo cave putes hæc inter se repugnantia, quo tempore κατὰ μὲν profunduntur à mulieribus, tantumdem lactis ab illis suppeditari, quantum alijs.

PORRO sicut in nutrice de lactis penu demitur omnino nihil, quando mensium patitur, & liberale profluvium; sic dum eodem in articulo ~~menstrui~~ quædam oritur intra muliebria, verosimile quidem hac utcunque agitari tubulos cruoris uterum alluentis, quibusdam saltem in lactantibus: omnes enim & singulæ mulieres æquali tunc non afficiuntur incommodo; finitimaque forsan hisce locis vasa leviusculè commotum iri; dum à tumultus impressione, qui sæpe tam gravis non est, lac ipsum incolume præstatur. At recens enixarum lac vitiosum semper; igitur & nutricum quæ sexus debitionem persolvunt. Fatemur pravum lac subministrari statim à partu, seu quoniam qui partum comitantur dolores aut antecedunt, quæve partum excipiunt tormina succorum crasin & economiamque turbavere non mediocriter: seu potius quoniam tunc versari quodammodo videtur in ancipiti natura, concursantibus videlicet huc illucque spiritibus & chylola materie: nam ambo variè convertuntur ad uterum, mammas & cor; atque per alternas vices, nunc fœtus velut etiamnum in utero morantis necdum exclusi, nunc infantis, nunc matris ipsius nutritioni spiritus & chylus cum anxietate simul incumbunt: arcendus ea propter ab ubere, nisi maternum fuerit, alumnus. Dispar est prorsus ratio in lactantibus nostris, quarum succis in tranquillo consistentibus naturæque tot in curas minimè distractâ, consuetum lactis opificium nihilo se-gnius utiliusque perficitur.

Non igitur improbanda nutrix obnoxia menstruo profluvio.

Proponebat Parisiis JACOBUS FOURNEAU, Parisinus, Baccalaureus Medicus. A. R. S. H. 1701.

Apud Franciscum Muguet, Regis & Facultatis Medicinæ
Typographum.